

B. N. C.
FIRENZE
1069
3

1069, 3









CONSIDERATION
SVR L'ESTAT
DE LA FRANCE.



A PARIS;

Chez PIERRE BVRAY, au mont
S. Hilaire, à la Court d'Albret.

M. DC. XIV.







CONSIDERATION
SVR L'ESAT DE
la France.

MADAME,

Si i'eusse eu l'accez, il y a trois mois que la liberté de ma viue voix eust esté plus opportune pour les aduis salutaires. Maintenant la necessité force mon Genie à se faire cognoistre exercité en l'escole du grand HENRY, pour rendre vn releué tesmoignage de mon industrie, la fidelité de mon courage.

Mon pays mon cher pays ressentira peut estre assez à temps & à point nommé mon affection naturelle, mon amour filiale mon charitable hola.

Amasis establisant les loix de la charité ordonna cestui-ci sur peines capitales.

Croæsus courant fortune de la vie desnoia la langue à son fils : la nature auoit

receu muet au monde Æglez Samien,
l'interest de la vie de celuy-là, de
l'honneur & du bien de cestuy-cy les fit
plaindre, plaider & parler librement pour
la conseruation de l'un & de l'autre.

Et ie ne parlerois pas en la menace du
sang, de la honte, & de la ruine! O puisse-
ie perir desaduoué de toy France, pauvre
France si ie t'abandonne en mon aage ad-
uancé de mes conseils fideles. Et si coup
au besoin ie n'imite encor ce ieune Sci-
pion qui mena Rome à Cartage vaincre
les victoires d'Annibal pour despoiller
Cartage de ses trophées & les amener en
triomphe à Rome.

Ouy ie tireray encor l'espee quand il
sera temps: Mais il n'est pas tousiours
têps de tirer l'espee. Il est tousiours tēps
de parler, de dire, de conseiller, mais
oportunément & avecques consideratiō.

L'on a voulu pratiquer en France
la coustume des Locriens pour quel-
ques livres aduis, tournant les re-
monstrances en risées, les plaintes en
mespris, les qualitez en coutumelies:
comme si proposer de remettre l'Estat
en son premier estat estoit vn cas de nou-
uellereté, l'on s'est mis en alarmes, iusques
à menacer les nuës, faire ombre au So-
leil, leuer les Gonfanons, les banderoles

François , entrecroiser les picques, comme si le champ de Mars ne pouuoit estre plus aduantageux aux Frâçois qu'en France , comme s'il n'y auoit point d'autres victoires destinees à nos courages, comme s'il ne nous estoit loysible de pratiquer d'autres butins que de nos despoilles , d'autres triumphes que de nos honneurs , ny bastir de plus releuez tombeaux qu'en nos campagnes des François acrauantez ammoncelez sous l'indifferente brutalité de nos volages indiscretions.

C'est l'artifice de la malice Madame, qui pour ne quitter l'aduantage qu'elle tient en vostre Regence aux plus emnents sieges du lisle veut mettre à couuert cherchant l'abri, & aux despens de l'Estat, faire (comme on dit) du cuyr d'autrui large couroye, chatouiller, esmouuoir, irriter les passions sous le deguysement & palliations de faux pretextes: Tirants de la verité de leur interest les apparences pour destourner les considerations des objets presents si sensibles neantmoins & si recogneus que l'on ne peut plus aller auant tant cette pauvre Frâce, Madame vostre Frâce est panthoise, hors d'halaine, en interualles, en Asmes qui la suffoquent en

6

telle sorte qu'elle n'a plus de voir que pour crier, *ie n'en peux plus!* Et encores on estouffe dans l'estomach ces tristes accents, ces languides paroles, ces mourantes plaintes de peur que vos aureilles ne donnent vne atteinte à vostre bonté Royale, à vostre pieté, pour en tirer la compassion, & en fin le fruit de vos misericordes.

Ils font ces malicieux comme ces coribâtes qui pour destourner l'effroy, la frayeur dont l'horreur de leurs sales mysteres touchoit ceux qui s'y rencontroyent, imitât le tonnerre & l'artifice de Salmo- ne réplissoyent l'air de bruit de tâbours de hurlemens: ou plustost ils font ces malicieux comme ce cruel Athenien, qui dorta dans Agrigente l'inuention de courir les voix, les cris, les plaintes humaines du mugissement d'un Taureau, pour destourner les compassions au milieu des gehennes, & au violent effort à la mort.

Madame escoutez, escoutez ce papier il parle. mon absence l'autorise de la creance d'un bon François. L'escoutant vous le iugerez digne de foy: Car il ne conteste pas problematiquement, il ny a point d'art, de fard, de m'enfonges de suppositions en ces paroles. Il vous parle de conseruer l'enfant en vie: il vous propose

Solomon : son exemple fera par vostre prudence l'examen de ceste verité.

Commandez qu'on apporte le glaue: mais Madame ostez-le, arrachez-le des poings de ceux qui s'offrent outils & organes à l'inhumanité de ce partage. Ce grand Roy sceut par vn singulier instinct de la Sapience diuine donner l'atteinte, toucher le cœur, esmouuoir & faire recognoistre la vraye mère: vous recognoistrez aussi Madame les legitimes enfans: ils ne pourront estre desaduouéz doutez & mescogneus, si vostre Majesté portant les esclans de sa pensee à ce qu'elle doit à la conseruation de sa personne, de la maison Royale, de la couronne remarque les demarches audacieuses de ceux qui se prestent l'espaule, comme se seruans de courbeselle pour releuer les estages de leurs proiects, & aduancer la main à la ruine de ce que tant de siecles ont edifié pour la reputation des Roys vos deuânciers qui d'une lōgue entresuite vous ont aussi attendu pour estre depositaire, possesferesse & vsufruitiere du plus glorieux champ d'honneur de la Chrestienté.

Vous en iugerez ainsi Madame, tournât l'un des yeux de vostre sceptre Royal vers les temps qui vous ont deuancé. Arrestez-vous par l'alternatiue sur le point

sur le moment pour reordonner, maintenir & fortifier vostre estat, en arrester l'esroulement, empescher qu'il ne panche à sa ruine. De ce point ainsi reordonné vous tirerez pour vous du contentement infini que la posterité vous iugera, non seulement digne des couronnes qui vous ornent le chef, mais capable de les releuer quand la violence les auroit terrassé, de les recourir quand on les auroit transporté ailleurs.

Ecoutez ceux qui vous parlent, mais discernez les voix & iuges quels instincts les portēt à vous destourner de la paix, laquelle vostre pauvre France toute clāgouree, sent, entend reduicte à l'extrémité au dernier spithame, rendre les abois.

Au nō de Dieu Madame, mettez vous en vos resolutions, ne les laissez dissoudre, par ceux dont les interests sont loin & autant differēs, des vostres que la terre est loin du ciel, & le noir differe du blāc. Royne Regente, mere vous tirez vostre splendide dignité de la paix. En elle tout l'Estat vous regarde.

Vn autre Ieroboan a conceu la peuarication; veut enleuer l'obeyssance & la forcer par les armēs à la rebellion. Considérez le rebut que Roboan fist par le conseil

conseil des ieunes: Considerez si les petits moments que l'on exagere pour faire monstre deuant vostre Majesté d'une mousche comme d'un Elephant, n'ont point d'autres interets plus grands, plus importants, plus dangereux à vostre estat par ceux qui offrent leur entremise.

Iugez par eux, par leurs premieres actions ou des leur, s'ils n'ont point pratiqué sur vostre estat ce qu'ils veulent empescher à vostre majesté, cōme vous interdisants la disposition de vos propres fonctions Royales, de vos liberalitez, de vos magnificences.

Et bien Madame, vous aurez rendu un Prince depositaire d'une seule entre, tant de vos maisons Royales, Que peut-on craindre, & au milieu de l'Estat, & de ce costé-là? Qui peut murmurer sans prononcer de sanglants blasphemes contre vostre propre sang. Ceux-là Madame, ceux-là qui tastonnent avec plusieurs bras les extremités & le centre, qui comme Amphitrités embrassent toute la terre, qui n'ont ny la qualité naturelle, ny peut-estre les interets par leurs desseins obligez à l'Estat, vous doiuent estre à craindre. Ce sont ceux qui ont fait cognoistre la puissance du Genie du grand Henry, vous en avez veu la pratique, le

effects. Mais que requiert vn Prince le premier de vostre sang, sinon ce qui s'accorde à l'indifference des hommes.

Ceux qui trauerfent la fonction de vostre Royale bôté, font mourir à vos pieds entre vos bras ce contentement qui vous combleroit de gloire & de felicité; Ce reſtaſſement de vostre France en ſa premiere ſplendeur. Le Clergé de vostre Royaume ne respire autre choſe: vostre Nobleſſe opprimee attend ſa reſtitution, ſon reſtaſſement. Le peuple haue, deſolé deſſaiſt baiſſe les ſoucils chargez de terre, le poil heriſſé, le dos courbé ſouſpire, crie, lamente, les vœux au ciel, la voix le cœur à vostre majeſté attendant ſon ſoulagement.

Mais Madame ceux qui ont empieté ſortants des condiſiōs de leur naiſſances, ſur l'ordre, qui ont renuerſé par leurs formes imaginaires, l'equite, la l'egalité, qui ont attaqué les plus fermes & ſolides edifices; qui ont ſappé les fondemens de la grâdeur de la monarchie Françoisſe, ceux-là Madame, ceux-là vous deſtournent, entant qu'ils, peuuent de ces glorieux deſſeins. Ils craignent la diminution de leurs autoritez qu'ils ont ſurpris par leurs Anarchies, & peut eſtre ſont ils venus iuſques aux menaces: mais entre les dents

de quelque temerité, de quelque cas de nouuelleté.

Monstrez vous Madame en vostre generosité, monstrez que vous estes sans estonnement. Car vous estes royne de France, royne dispositrice de ceste Noblesse qui a porté les vengeance, la terreur, & la mort aux coings du monde parmy les nations qui ont irrité ses armes, ou l'amour & la reputation à ceux qui se sont vnis & tenus a recoy dans leurs alliances.

Prenez garde aux effects de l'espee tumultuaire, on la tire aisémēt, mais on n'en trouue pas facilement le fourreau. Demeurez Royne paisible de la plus riche possession de l'Europe, ne permettez que la desolation s'auance sur les fertiles campagnes & la ruine dans les riches villes de cette Monarchie.

Ainsi Dieu benisse vos pas, ainsi le ciel responde à vos vœux, vous donnant longuement coadiutrice au restablissement, augmentation & conseruation de vostre estat, au Roy vostre fils, que Dieu benisse de toutes faueurs spirituelles & temporelles autant qu'il la beny l'ayant fait naistre la teste leuee sur tous les Roys qui inuoquent son nom.

Jugez Madame apres les effects des des-

seins d'Astacopus en Sparte, par lesquels il esleua l'autorité des Ephores, pour rabaisser la royauté, que ceux qui vous cōseillent la guerre accroissans de creance & autorité, seront contrevolles, & de celle du roy & de la vostre. Si ie suis si heureux que mes considerations soyent recommandées, prises de bonne part & ayent quelque poix pour parer aux atteintes qu'on vous donne, ie seray assez content, encores que ie ne sois point cogneu: ie ne murmuray point pour briguer les recognoissances, ny de mes premiers & long services de trente & cinq ans, ny de la continuation de ma fidelité ie n'enuiroy point aux gens de bien le progres de leurs fortunes. Je seray cōme Pedarete en Sparte, ie desireray & feray mes vœux à Dieu que tous les François soyent recogneus meilleurs plus capables & necessaires que moy, qui suis de vostre Majesté Madame.

Tres-humble tres-obeissant
& tres-fidele sujet & serui-
teur S. B. S.

4069

3

958639









MC

